



Terenga 3: Hōtaka 17 – Whakamārama Take / Tuku Takunga

Kei ngā ringa tango parahia i te tinaku o te reo Māori, tēnā koutou katoa. Nau mai kia ngaki ai tāua i tā tātou māra kia matomato ai te tupu o te reo i roto i ō tātou kāinga.

Hei Mahi Whakarongo

Ākuanei tātou ka rongō anō ki ngā whakaaro o Huirangi Waikerepuru nōna ka uiuitia e Waihoroi i runga i Te Tēpu. Anei ngā pātai hei whakautu mā koutou:

- 1) Mā te aha e tōtika ai tātou katoa?
- 2) Ka pakanga tonu tātou i konei ki te kore tātou e aha?
- 3) E toru ngā āhuetanga o te whakaaro Māori. He aha aua mea e toru?

He Whakamārama

Tirohia ngā rerenga e rua e whai ake nei. He rite tonu tētehi ki tētehi.

He...nō = nā te mea...

- He kaha nō taku hoa ki te kōrero, nāna i tuku mihi ki te ope.
- Nā te mea he kaha taku hoa ki te kōrero, nāna i tuku mihi ki te ope.

E rua ngā wāhanga o te rerenga. Ko te **take** me te **hua**. Kia tirohia ētehi tauira ka tohu ai i te take me te hua ka ara ake i taua take.

- a) He **pāmamae** nōna **i kore ai ia e haere ki te hui**.
- e) **Kāore ia e haere ki te hui**, he **pāmamae** nōna.

take = e pāmamae ana ia
hua ka puta = kāore i haere ki te hui

Hei Mahi

Anei ngā take me ngā hua. Tuhia he rerenga kōrero e whai ana i te whakatakotoranga 'He...nō' hei tuitui i ngā taha e rua.

1. take: he pōturi taku kurī
hua: i mahue i te poaka
2. take: i moeroa ngā tamariki
hua: i tōmuri te taenga ki te kura
3. take: kāore i oti ngā mahi kāinga
hua: i kohetengia ngā tauira
4. take: he whakamā ia
hua: i tangi te tamaiti

He Whakautu:

1. He pōturi nō taku kurī i mahue ai i te poaka.
2. He moeroa nō ngā tamariki i tōmuri ai te taenga ki te kura.
3. I kohetengia ngā tauira he kore nō ngā mahi kāinga i oti.
4. I tangi te tamaiti he whakamā nōna.